

KOMUNIKADO DI PRENSA

Promé aña di ENNIA despues di restrukturashon; ku resultado positivo 2025

Willemstad 13 di Yanüari 2026- E promé aña di ENNIA komo un entidat hurídiko nobo bou di e mesun marka, a bai positivamente segun gerensia di ENNIA. For di yanüari 2025 e organisashon a keda reorganisá den kuadro di un proseso di restrukturashon drástiko, kaminda a formulá i realisá meta di rekuperashon bon kla definí.

Segun gerensia e promé aña di ehekushon a bai notablemente positivo: a logra mas ku e metanan stipulá i e perspektivanan pa e periodo ku ta bini ta hopi faborabel.

No por publiká e resultadonan finansiero definitivo ainda, pa motibu ku nan mester keda kontrolá promé i aprobá pa accountant. ENNIA ta spera di por presentá resultadonan positivo den su kuenta anual ku lo keda publiká na fin di aprel 2026.

E desaroyonan akí ta marka un momentu importante di logro den e proseso di restrukturashon inmenso ku a kuminsá i a keda konkluí na fin di aña 2024. E empresa for di e momento ei a enfoká riba rekuperá konfiansa, amplia transparensia i reforsá su posishon i relevansia den un merkado ku ta kambiando rápidamente.

“Maske nos ta konsiente ku e sifranan ainda ta preliminar, nan ta duna indikashon hopi kla ku nos ta riba e ruta korekto”, segun Lesley Ann Brodie, kende ta CEO di ENNIA. “Implementashon di kambionan drástiko nunca no ta fásil, pero e ta krea ánimo si nos mira ku nos esfuersonan konhunto a kuminsá duna fruta”.

Gerensia ta enfatisá ku e resultado, lo no tabata posibel sin e konfiansa i sosten di klientenan, partnernan, empleadonan, gobièrnu i otro gruponan di interes. “Nos ta agradesido na tur ku durante e periodo akí a sostené nos. E konfiansa ei ta un motivashon importante pa sigui traha riba un organisashon duradero ku ta orientá riba futuro.”

Na mesun momentu ENNIA ta enfatisá di lo no ta pará ketu i lo sigui desaroyá su mes. E añanan ku a pasa tabatin bastante reto, i merkado ta sigui kambia rápido. Klientenan ta eksigí mas, e ekspektativanan ta kambia kontinuamente i e desaroyonan teknológiko tin kada biaha mas impakto riba produktonan, servisio i maneho di e empresa.

“Nos lo keda alerta i realista” Lesley Ann Brodie a kontinuá bisando. “Esaki sigur no ta e momentu pa relahá. Nos lo sigui invertí den nos empleadonan, den inovashon, relashonnan ku klientenan i kresementu riba un base duradero”.

Lo publiká e kuenta anual definitivo i kontrolá di ENNIA, despues di aprobashon di e Hunta di Komisario, na fin di aprel 2026.